

- केन्द्रीय मंत्रिमंडल 6 हजार 8 सौ 39 करोड़ रुपया रा खर्च वाळा वाइब्रेंट विलेज प्रोग्राम रा दूजा दौर ने मंजूरी दीनी— इण ऊं सरहदी गांवां रो विकास कर्यो जावेला।
- संसद रा दोन्यू सदनां री कार्यवाही आज बेमियादी बगत सारु टळी—लोकसभा अध्यक्ष ओम बिरला कह्यो—सत्र रे दौरान सदन मांय 118 फीसदी उत्पादकता दर्ज करी ज्यी।
- साल 2008 मांय जयपुर मांय एके पाछे एक व्ह्या बम धमाकां पाछे जीवता बम मिलण रा मामला मांय अदालत चार आरोपितां ने दोषी करार दीना।
- प्रदेश मांय मुख्यमंत्री अनुप्रति कोचिंग योजना रा तैत अर्जी देवण री आखिरी तारीख 12 अप्रैल ताई बधायी ज्यी।

000

केंद्रीय मंत्रिमंडल छह हजार आठ सौ 39 करोड़ रुपया रा खर्च वाळा वाइब्रेंट विलेज कार्यक्रम रा दूजा दौर ने मंजूरी दे दीनी है। ई कार्यक्रम रा तैत अंतर्राष्ट्रीय सरहद कने रा गांवां मांय विकास रा काम कर्या जावेला। सूचना अर प्रसारण मंत्री अश्विनी वैष्णव आज नई दिल्ली मांय खबरनवीसां ने कैबिनेट री मीटिंग मांय करी ज्यी फ़ैसलां री जाणकारी दीनी। वे बतायो के ई कार्यक्रम रो मकसद राजस्थान, गुजरात अर पश्चिम बंगाल समेत न्यारा—न्यारा सरहदी हलकां मांय हिफाजत सागे वठे रा रहवासियां री जिन्दगी मांय सुबीता बधावणो है।

मंत्रिमंडल रेल मंत्रालय री 18 हजार 6 सौ 58 करोड़ रुपया रा खर्चा री चार परियोजनावां ने ई मंजूरी दे दीनी। आं परियोजनावां ऊं महाराष्ट्र, ओडिशा अर छत्तीसगढ़ रा 15 जिलां मांय रेलवे रो मौजूदा नेटवर्क करीब एक हजार 247 किलोमीटर ताई बध जावेला।

000

संसद रा दोन्यू सदनां री कार्रवाई आज बेमियादी बगत ताई टाळ दीरीजी। ई सागे ई संसद रो ई साल 31 जनवरी ने सरु व्ह्यो बजट सत्र पूरो व्हे ग्यो। ई मौके दिया ज्यी भाषण मांय श्री बिरला बतायो के बजट सत्र रे दौरान सदन मांय 118 फीसदी उत्पादकता दर्ज करी ज्यी।

संसदीय कार्य मंत्री किरें रिजिजू आज पूरा व्ह्या बजट सत्र ने घणो सार्थक बतायो। नई दिल्ली मांय खबरनवीसां सागे बातचीत करता थकां कह्यो के वक्फ संशोधन बिल माथे चर्चा रे दौरान एक ई दफा सदन री कार्यवाही मांय कोई अड़चन नी आयी। वे कह्यो के संसदीय इतिहास मांय किण ई मुद्दा माथे इतरी लंबी चर्चा नी व्ही। श्री रिजिजू कह्यो के बजट सत्र रे दौरान लोकसभा मांय 16 अर राज्यसभा मांय 14 बिल पास करी ज्यी। मुख्यमंत्री भजनलाल शर्मा 'वक्फ संशोधन बिल-2025' रे संसद रा दोन्यू सदनां मांय पास व्हेवण परां जनता ने बधाई दीनी है। वे कह्यो के वक्फ संपत्तियां रा बारा मांय बरसां ऊं चली आ रही अनियमिततावां अर अपारदर्शिता ने खत्म करण सारु ओ बदलाव जरूरी हो। मुख्यमंत्री कह्यो के ओ वक्फ प्रशासन मांय साफगोई, जवाबदेही अर निपख व्यवस्था तैय करण सागे गरीब अर जरूरतमंद लोगां ने मजबूत बणावेला।

000

जयपुर डेयरी काल 'सरस लाडो मायरा योजना' सुरू करेला। ई रा तैत डेयरी ऊं जुड्या दूध उत्पादकां री बेटियां रा ब्याह मांय 21 हजार रुपया रो मायरो ले जायो जावेला। जयपुर डेयरी रा प्रबंध निदेशक मनीष फौजदार बतायो के डेयरी खुलण रा 50 साल पूरा व्हेवण रे मौके आ योजना चलायी जा रही है। इण ऊं करीब डोढ़ लाख पंजीकृत दूध उत्पादकां ने फायदो मिलेला। वे बतायो के ई योजना रो मकसद बाल लिंग अनुपात ने संतुलित करणो अर बालपणा मांय ब्याह रोकणा है।

000

जयपुर मांय करीब 17 साल पैली व्ह्या सीरियल बम धमाकां पाछे जिंदा बम मिलण रा मामला मांय आरोपित चार जणां ने अदालत दोषी करार दीना है। बम धमाका मामला री खास अदालत रा जज रमेश कुमार जोशी आज ई मामला मांय शाहबाज हुसैन, मोहम्मद सरवर आजमी, मोहम्मद सैफ अर मोहम्मद सैफुर्रहमान ने दोषी करार दीना। अदालत सजा रा बिंदुआं माथे 8 अप्रैल ने फैसलो सुणावेला।

ई मामला मांय राज्य सरकार री ओर ऊं विशेष लोक अभियोजक सागर तिवारी पैरवी कीनी। ध्यानजोग है के जयपुर मांय 13 मई, 2008 ने एके पाछे एक 8 बम धमाका व्ह्या हा। आं धमाकां पाछे जयपुर शहर मांय चांदपोल रा रामचंद्र मिन्दर कने जिंदा बम बरामद व्ह्या हा।

000

राजस्थान पुलिस री एंटी गैंगस्टर टास्क फोर्स-एजीटीएफ रोहित गोदारा गैंग सारु काम करण रा आरोपित आदित्य जैन उर्फ टोनी ने संयुक्त अरब अमीरात रा दुबई ऊं राज्य मांय ले आयी है। एजीटीएफ री कोशिशां ऊं आदित्य जैन ने दुबई री पुलिस दस्तयाब कीनो हो अर राजस्थान पुलिस आज संवारे वां ने ले र जयपुर पूगी। एजीटीएफ रा मुखिया अर एडीजी-अपराध दिनेश एम एन आज खबरनवीसां ने आ जाणकारी दीनी। वे बतायो के जैन माथे लारला करीब एक साल ऊं रोहित गोदारा गैंग सारु डिब्बा कॉलिंग रो काम करण रो आरोप है। वे बतायो के टोनी रे खिलाफ केई मामला दर्ज है अर वां माथे काबू करण सारु इंटरपोल री मदद ली जा रही ही।

000

प्रदेश मांय मुख्यमंत्री अनुप्रति कोचिंग योजना रा तैत अर्जी देवण री आखिरी तारीख बधा र 12 अप्रैल कर दीरीजी है। सामाजिक न्याय अर अधिकारिता विभाग रा निदेशक बचनेश अग्रवाल आ जाणकारी दीनी। वे बतायो के ई योजना रा तैत न्यारा-न्यारा व्यवसायिक कोर्स मांय दाखिला सारु व्हेवण वाळी प्रवेश परीक्षावां अर सरकारी नौकरियां बाबत व्हेवण वाळी प्रतियोगी परीक्षावां रे वास्ते उम्मीदवार मुफ्त कोचिंग सारु अर्जी दे सके है। आं उम्मीदवारां ने विभाग ऊं जुड्या कोचिंग संस्थानां मांय दाखिला दिया जावेला।

000

हिन्दी फिल्मां रा नामी कलाकार मनोज कुमार आज संवारे मुंबई मांय देवलोक व्हे गया। 87 साल रा मनोज कुमार लम्बा बगत ऊं मांदा हा। काल संवारे मुंबई रा विले पार्ले मांय वां रो दाग कर्यो जावेला। भारत कुमार रा नाम ऊं मशहूर मनोज कुमार 24 जुलाई 1937 ने ब्रिटिश भारत रा ऐबटाबाद मांय व्ह्यो हो। पद्मश्री अर दादा साहब फाल्के पुरस्कार ऊं नवाजी ज्या मनोज कुमार उपकार, पूरब और पश्चिम, क्रांति, वो कौन थी, गुमनाम अर हिमालय की गोद में सरीखी केई सुपरहिट फिल्मां मांय एक्टिंग कीनी अर केई फिल्मां बनायी।

000

उत्तराखंड रा जाजर देवल मांय निगराणी रे दौरान ऑक्सीजन री कमी रे कारण काल देवलोक व्ह्या सीकर ज़िला रा आईटीबीपी रा जवान रतनलाल गुर्जर रो आज वां रा गांव सांवलपुरा तंवरांन मांय सरकारी मान सागे दाग कर दियो ज्यो। इण ऊं पैली वां रा मान मांय तिरंगा यात्रा निकाळी ज्यी, जिण मांय मोटी तादाद मांय जनता रा नुमाइन्दा अर आम लोग शिरकत कीनी। ध्यानजोग है के रतनलाल गुर्जर भारत-तिब्बत सीमा पुलिस बल- आई.टी.बी.पी री 14वीं बटालियन मांय तैनात हा।

000

चैती नौरता रा सातवां दिन आज मां दुर्गा रा कालरात्रि रूप री आराधना करी जा रही है। ई मौके जयपुर कने आमेर रा शिला माता मिन्दर मांय मोटी तादाद मांय जातरू दर्शन सारू पूग्या। जैसलमेर रा भादरियाराय मिन्दर मांय मेळो भर रह्यो है। ई सागे ई न्यारी-न्यारी शक्तिपीठां माथे पूजा-पाठ रो सिलसिलो चाल रह्यो है। ई मौके प्रधानमंत्री नरेन्द्र मोदी सोशल मीडिया रे जरिये कह्यो के मां जगदम्बा री कृपा भक्तां री जिन्दगी मांय खुशियां री नुवी सुबह ले र आवे है। वे कह्यो के नौरता मांय देवी मां री आराधना मांय लता मंगेशकर री आ स्तुति सगळा री जिन्दगी मांय नुवी ऊर्जा रो संचार करण वाळी है।

000

रेल रा सफ़र रे दौरान मुसाफिरां रा गम्योडा मोबाइल फोन ने संभाळबा सारू रेलवे सुरक्षा बल (आरपीएफ) दूरसंचार विभाग रा सेंट्रल इक्विपमेंट आइडेंटिटी रजिस्टर (सीईआईआर) पोर्टल सागे साझेदारी कीनी है। नॉर्थईस्ट फ्रंटियर रेलवे (एनएफआर) मांय चलायी ज्या पायलट प्रोग्राम री कामयाबी पाछे आ पहल करी ज्यी है। गम्योडो मोबाइल फोन ओजू हासिल करण री कोशिश रा तैत मुसाफिर रेल मदद या 139 डायल रे जरिए इण री जाणकारी दे सके है। मुसाफिर एफआईआर दर्ज करा सकेला या सीईआईआर पोर्टल माथे शिकायत दर्ज करा सकेला। नुवी सिम सागे गम्योडा फोन री ठा पड़बा री सूरत मांय गम्योडो फोन काम लेवण वाळा ने इण ने नजदीकी आरपीएफ पोस्ट माथे देवण री राय दी जावेला। ई पाछे मोबाइल रो असली मालिक ज़रूरी कागज़ात पेश कर र फोन पाछो हासिल कर सकेला।

000